

Apudok Shup Douk Jut Nenekap Iri

Banenyi Baraen Um Enyudok Baraen Jut Neneken Iri

ves 1-2 Jut nowem yopinyi baraen um Iruhin nini Jisas Kraiss hutaurum
eshesh Kristen

ves 3-16 Anam armam henek rohwmesh iri hawish um eshesh Kristen
aria hape henek rohwmesh um shunek yoweishi inahos. Aria
Iruhin ta nuwanam um yoweishi inahos amam henekesh iri

ves 17-23 Jut nahwarap um miyotu dodog aria munek yopihi atih aih
ves 24-25 Jut natuk Iruhin ananin nyeigur nyato iruhw

¹Eik Jut, Jems ananin wanin douk yape shakamum Jisas Kraiss yenek
ananin mour iri yenekumepogu apudok shup ipak armam armago douk
Iruhin nahwarep um pupe ananip atip iri. Ipak douk apakin Yain Iruhin
urkum manawashamep aria Jisas Kraiss narokarubep pape wosik iri. ²Eik
yakri ehudok aih um Iruhin nenek gihaumep um huni ehudok um ipak
urkwip punawasham kupaishi um huni ehudok um ipakiruh aparuh hur
wosik um hutogur dedebah atih um ipak.

Henek Rohwmesh Iri Armam Amamin Baraen

³O ipak eikish abom arpes! Sagomatin eik yape urkum morum yakri
iwemepogu um ipak enen baraen um agundok Iruhin nataurum apak
ihishmorim narap matanamori mape wosik abom um. Aria douk eik
yemnek um eik ta iwemepogu um ipak enyudok enen baraen. Baraen
enyudok. Eik yakri ipuhur um piyoh enyudok Iruhin ananin adurin baraen
douk apak Iruhin ananish arpes makri adurin masuhwen magipeshen iri.
Aria piyotu dodog pubo Kraiss ananim horim douk henek rohwmesh hakripesh
kupainyi baraen iri amamin baraen nyubuhuk. Enyudok baraen douk
apak makri adurin magipeshen iri, Iruhin douk nakopen atuh meyoh apak
ananish arpes. ⁴Um maresh? Anam armam henek rohwmesh hatogur kabi
Iruhin ananim um aria hanabeshuk hawishi um ipak Iruhin ananipi. Aria
enen baraen douk seiwok nyetem Iruhin ananik Buk iri douk nyakrium

amudokmori armam. Enyen nyakri Iruhin douk juwehosin-umam aria ta nusuhw amamig kwotog aria nukri amam henek yoweishi inahos iri. Amam douk madae hudukemesh um Iruhin uwe aria henek rohwumesh hakripesh hakri baugenyum baraen um Iruhin nataurumap meyoh um douk namudok. Hakri, “Aria eshesh wata shupe shunek yoweishi inahos um, Iruhin ta nenek gihaumesh aria mare nunekesh shumnek eriger, uwok.” Amam hakripesh enyudok baraen um nytaurum amamih eneheneh yoweih aih um shenek wehrur um. Aria amam hakonaguk agabus Jisas Kraish douk anan atun abom Dodogowini Debeini.

⁵Adur, ipak padukemen enyudok baraen um seiwok Debeini nataurum eshesh Israel um. Anan naraesh shakutukuk agudok debeigi nahobig Isip shanak shape wosik. Aria madae roubi uwe, anan nabo shashudok Israel douk madae shumnek ananin baraen shugipeshen iri uwe shagok. Aria douk eik yakri gamo ikripep um ipuhur um ipak urkwip purum enyudok Debeini neneken um eshesh Israel iri. ⁶Ipak urkwip purum eshudok enselahos shopunek douk seiwok madae shupe shakamum Iruhin shiyoh enyudok mour nyani debeishi nyeiguhw anan nekeshesh iri uwe. Eshesh shakutukuk esheshibur wabur. Douk namudok aria Iruhin noweshikesh dodog abudok dodogowibi senab douk bape ihih nyumneh iri aria douk shape arukwutigunum. Eshesh shape shatrugun um ahudok debeih nyumnah douk ta anan nusuhw eshesh shuni ihishmorim arpesh esheshig kwotog ahi. ⁷Aria ipak urkwip purum eshudok arpesh douk seiwok shape arbudok biarub yoweirubi warub Sodom iri Gomora bani arbudok bape hurukatin iri. Eshesh shenek eneshenesh yoweishi inahos abom um shenek wehrur um. Aria seiwok arigaha douk, eshesh douk shani eshudok enselahos shape shatrugun um ahudok nyumnah um Iruhin nusuhw esheshig kwotog ahi. Eshesh shenekesh namudok aria Iruhin nawanam-umesh eshudok yoweishi inahos nenek debeih nyih douk hanu hape ihih nyumneh iri hanish aria shemnek debeiri eriger shape ihih nyumneh. Anan nenek enyudok nyatogrumesh um apak mutrish aria munogugur mare mugipesh esheshih yoweih aih, uwok.

⁸Mamudok armam douk hanabeshuk hawish um ipak Iruhin ananish arpesh iri, amam apa henek ehudokmori aih eshesh Sodom iri Gomora shenekeh iri. Ihismorim yomnis amam hatrus iri douk sohur amamip urkwip um hunek yoweih aih um amamiruh yegeshiweruh. Aria amam hekenyuk agabus Iruhin ananin dodogowinyi baraen aria heyagwreh-umesh enenyenen eshudok nyeiguhw shatoumeshi kabi enselahos um. ⁹Seiwok enyudok ensel douk debeinyi abom um ihishmorim enselahos iri nyonahwar um Maikel iri nyani Satan shanogogonim um ta omi nyurao Moses ananit mukwut um, Maikel madae nukri anan douk dodogowini aria nukri niyagwreh-uman enenyenen Satan uwe, uwok. Anan nakripan nakri, “Debeini anan kanak ta wosik nuhen!”

¹⁰Aria mamudok douk hanabeshuk hani ipak pape iri heyagwreh-umesh enenyenen ihishmorim eshudok eneshenesh douk amam madae hudukemesh iri uwe. Aria ehudok aih amam hadukemeh aria hagipeshesh iri, eheh douk kabi wanarish mahish eshesh kanak shadukemeh shenekeh um. Amam henek ehudok yoweih i aih aria ta ehudok aih atin ta hunekam yowem abom.

¹¹Adur, kweipon amam ta humnek debeiri eriger! Amam douk hagipeshuk Kein^a ananish yoweih i aih. Aria amam urkwip por abom um utabor atabor aria hagipesh abom Balam^b nenekeh iri yoweih i aih. Aria amam hakonagak agabus Iruhin kabi douk seiwok Kora^c nakonagak agab um. Amam douk henekesh namudok aria amam ta douk yowem abom kabi douk seiwok Kora yowen abom um.

¹²Babudok nyutob ipak pani kupaishi Iruhin ananish arpesh urkwip por arag atin aria pantorum pape pawok worigun obi nyutob, amudok armam shopunek hani ipak pape hataurumep pagnoh. Amam hani ipak hapeum, amam henek yoweih i aih um Iruhin ananis nabes. Madae abraenyim um agundoki worigun amam urkwip porum amam kanak atin. Amam abraen madae nyom um amamih yoweih i aih amam hape henekeh iri uwe. Amam hani ipak pape pawok worigun aria amam madae urkwip purum hukri hubiram kupaishi arpesh uwe. Amam urkwip porum amam atum. Amam douk hape kabi onog orug.^d Agudok orug douk uhwin nyaragwi aria eshah madae anah hurari uwe. Aria shopunek, amam kabi douk shuruwep peiragosi rowos. Douk nyutob um shuruwep pir um banaki aria shuruwep madae enep pir uwe. Agagos douk shatukagos um baugos aria yarigos abom. ¹³Amam henek abraenyih i aih aria ehudok aih hatogur kabi youg debeibi morub batuk aria benek ahwas sanaki saku anagas um. Aria shopunek, amam hape kabi unib douk waktukuk owowih yeh wanarahe wanak hwaroh iri um. Aria Iruhin douk nenek anabur arukwutigun-iburi wabur bape um ta kweipon hunak hupe ihih yumneh um.

¹⁴⁻¹⁵Adam ananip awirop sharik shape aria awiros sakitak sanaki aria sakri um namba 7-ip um shabuki anudok arman Inok. Aria seiwok Inok nakriפש enen baraen um eshudok douk ta kweipon shugiguk shutograri iri. Anan nakriyen um amudokmori henek rohwmesh iri

^a 1:11 Seiwok Kein nenek yoweishi inahos namudok. Anan juwehosin um ananin wanin aria nan nagok. Ipak putik Jenesis 4:1-5. ^b 1:11 Seiwok Balam nakri nutogur Iruhin ananin profet aria kupaimi hunokuneman um utabor um nunek Iruhin ananish arpesh shunek yoweishi inahos. Ipak putik Namba 22:5-41. ^c 1:11 Kora nenek yoweishi inahos nekenyuk agab Iruhin ananin baraen namudok. Anan narao anam armam hagipeshan hakanuguk agabus Moses nani ananin big Iruhin nakonen iri. ^d 1:12 Amamin baraen madae nyutaurum arpesh uwe. Enyen kabi orug douk madae gwunek eshah hurari iri uwe o kabi rowos douk shuruwep madae enep pir um uwe.

armam nakri namudok, “Ipak mnek! Kweipon Debeini ta nini ananish sabaishi tausenish enselahos shunaki. Eshesh ta shunaki um anan nusuhw ihishmorim arpesh esheshig kwotog. Aria nuwanamesh yoweishi inahos yoweishi arpesh nunekesh shumnek debeiri eriger um nuyabigesh shudukemesh um eshesh douk shenek yoweishi inahos aria eshesh douk shemnek debeiri eriger. Aria anan ta nuwanamesh esheshih yoweih aih um shakon agabus Iruhin um aria sheyagwreh-uman enenyenen yoweinyi baraan um.”¹⁶ Amudok henek rohwa iri armam amamiruh aparuh madae hur wosik aria hupe wosik atin uwe, uwok. Amam apa henek sousunah hariguk um eneshenesh eshudok douk shatogrumam iri. Aria amam apa heyagwreh hariguk um eneshenesh eshudok. Amam hagipesh yoweih harik hapeum iri aih um henek yoweishi inahos um. Amam hapeum hakri hutuk amamish atish nyeiguhw shuto iruhw aria hakripesh yopinyi atin baraan kupaishi um huhur esheshiruh aparuh um shugipesham shunek eneshenesh yoweishi inahos amam hakriyesh iri.

Ipak Ta Pupe Dodogowip Atip Abom

¹⁷Aria ipak eikish arpesh abom! Ipak ta urkwip purum enyudok baraan um eshudok douk riguk Debeini Jisas Kraiss ananim aposel hakripesh-umesh um ta shutograri iri. ¹⁸Amam hakripep hakri, “Hugiguk iri nyumneh hutogurum, anam armam douk ta hunumogesh Iruhin ananish aih iri ta hutogur. Amam ta hukon agabus Iruhin aria ta hugipesh yoweih harik hapenyam iri aih aria hunek eneshenesh yoweishi inahos.”¹⁹ Aria douk amudok atum armam hape henek ipak Iruhin ananish arpesh panadi-yogurum pape sisiguk. Amam douk hagipesh yoweih harik hapenyam iri aih aria henek eneshenesh yoweishi inahos amam kanak hakri hunekesh iri. Amam douk madae Iruhin ananin Mishin nyupenyam uwe, uwok.

²⁰Aria ipak eikish arpesh ta pusuhw Iruhin ananin baraan dodog pugipeshen. Iruhin douk baugos um ehudok yopihi aih um ipak penek bilipuman um. Aria putogur dodogowip abom um ehudok aih um penek bilipuman um. Aria ipak ta pugipesh Iruhin ananin Mishin nyupuhur um punek beten um aria ta punek beten. ²¹Aria Iruhin douk urkum manawashamep aria ipak ta pupe hurukatin um anan. Aria ipak pupe putrugun um apakin Debeini Jisas Kraiss douk nenek gihaumep iri um nunekep pupe wosik abom ihih nyumneh.

²²Ipak penek gihaum eshudok arpesh douk shasuhw Iruhin ananin baraan aria eshesh madae shusuhwen dodog abom shugipeshen iri uwe. Aria putaurumesh um punekesh shusuhwen dodog shugipeshen. ²³Aria enesh douk hurukatin um shakri shukonaguk agabus Iruhin iri, eshesh kabi douk shagrukuk orokohunih um nyih um. Douk namudok aria ipak ta putaurumesh putukeshi um ehudok nyih puraesh shutanamori shupe

wosik. Aria ipak pukri gihaumesh eshudok enesh douk wata shatanam shagipesh yoweihari hapenyesh iri aih um shenek yoweishi inahos um aria putaurumesh. Aria pukri putaurumesh um, ipak ta gamo pudukemesh um ta wosik atin ipak pugipesh esheshih yoweihari aih. Ipak ta pukri uwok-umeh abom.

Apak Ta Mutuk Iruhin Ananin Nyeigur Nyuto Iruhw

²⁴Apak mutuk Iruhin ananin nyeigur nyuto iruhw. Um maresh? Anudok Iruhin anan douk dodogowini aria wosik um nutaurumep nunekep piyotu dodog aria mare putu punek enesh yoweishi inahos. Aria shopunek, anan douk dodogowini aria wosik um nunekep pupe wosik aria mare enen baraen nyupenyep um enesh yoweishi inahos. Aria punadudareh abom abudok nyutob anan nuraep punak ganudok anan natrugun abom aria napeum. ²⁵Anan douk anan atun abom nape apakin Iruhin douk nataurumap narap matanamori mape wosik atin iri. Aria enyen douk um enyudok mour apakin debeini Jisas Kraisi neneken iri atin aria Iruhin narap mape namudok. Douk namudok aria agundok natrugun abom um nini debeinyi nyeigur nyuni debeinyi big nyuni agundok Iruhin dodogowinari nape debeini um eneshenesh eshudok um douk shupe um anan atun. Seiwok baugos um arigaha douk, arigaha kweipon shopunek ta shupe um anan atun ihih nyumneh! Adur atin.